

Äntwert vun der LSAP op de Questionnaire vun der APEG an der LBSA

1) Wéi setzt dir iech fir eng qualitativ héichwärtig Kanner - a Jugendbetreung an, am Kader vun der non-formaler Bildung?

An hirem Wahlprogramm plaidéiert d'LSAP fir e landeswäit Konzept mat eenheetlechen Qualitéitscritèren fir d'Kannerbetreung, wat dann an enger Zesummenaarbecht mat de Gemengen, den Träger an de Schoulen ëmgesat gëtt. Et geet drëms e gesetzleche Kader ze setzen bannent deem d'Strukturen dann awer e gewësse Spillraum hale sollen, wat di méi konkret Ëmsetzung ugeet.

Mir sinn der Meenung, dass eng gutt Kannerbetreung méi muss sinn wéi just „Kanner versuergen“. Et muss ee sech kloer ginn, wat di Valeuren a Kompetenze sinn, déi een de Kanner well vermëttelen; sech konkret Ziler setzen an eng Strategie entwëckelen fir di Ziler z'erreichen an dann déi néideg Moyën mobiliséieren.

Et schéngt kloer, dass et an deem Sënn och eng gewësse Kontroll an Evaluatioun muss ginn.

Wat d'Qualitéitscritèren ugeet, müssen déi méi wäit goen a méi breed gräifen wéi di reng technesch a quantitativ Critèren a Saachen Infrastrukturen oder Personalschlüssel. Mir fannen dass an de läschte Joeren vill Effort'en an der Quantitéit vun de Kannerbetreuungsplazen gemat gouf, an dat giong ze vill oft op Käschten vun der Qualitéit, déi dobäi praktesch vergiess gouf.

Fir d'Zukunft brauche mer och eng Bestandsopnam iwwert d'Besoin'en u Kannerbetreuungsplazen, fir dass een a Rou ka plangen an net nëmmen eng grouss, mee virun allem och eng gutt Kannerbetreung opbauen kann, déi de Besoin'en entsprécht.

Et schéngt eis evident dass dës Iwwerleeungen an Iddien d'selwecht fir den ëffentlechen a fir de private Beräich musse gëllen, fir Maisons relais, Foyers scolaires, Crèche an Dagesmammen a - pappen.

2) Wat géift dir un der Formatioun an un de Studien vun de sozioedukative Beruffer (Erzéier, Sozialpädagoge) verbessern?

D'LSAP ass der Meenung, dass d'Formatioun an d'Studien vun de sozioedukative Beruffer a regelméissegem Ofstänn sollten mat de Leit vum Terrain un d'Ufuerderunge vun der Zäit ugepasst ginn. E ganz wichteg Volet schéngt der LSAP an deem Sënn och d'Formation continue ze sinn, wou eng breed an ugepassten Offer sollt bestoen.

Ee Beräich, dee sécherlech seng Plaz misst hunn, ass di praktesch Gestiou vu Konflikter an den Ëmgank mat Verhalensopfällegkeeten.

3) Wéi stellt dir iech gemeinsam Richtlinnen fir eng kohärent Erzéiungspolitik vir (z.B. Zesummenaarbecht Schoul-Maisons relais)?

Fir d'LSAP bezitt sech d'Erzéiung vun de Kanner net nëmmen op formal Bildung, déi vun der Schoul vermëttelt gëtt, mä och op informal Bildung, déi souwuel an der Schoul, wéi och am Alldag vun de Kanner an an de périscolairen Aktivitéite stattfënnt. Well d'Erzéiung also als Ganzt ze gesinn ass, ass et eis wichteg, dass d'Personal vun de Schoulen a vun de Maisons relais gutt zesumme schaffen.

D'Gesetz vun der Reform vun der Grondschoul vun 2009 gesäit vir, dass ab der Rentrée 2013-2014 all Gemeng e Plan d'encadrement périscolaire (PEP) ausschafft, deem d'Zesummenaarbecht tëschent de Schoulen an de Maisons relais, am Kader vun der Schoulorganisatioun definéiert. Dëse PEP hält de genaue Plang fest, wéi eng Aktivitéite vu wem organiséiert ginn. D'LSAP wëll ofwaarden op de PEP seng Friichten dréit, an wann dat net de Fall wier, ass se bereet Adaptatioune virzehuelen.

4) Zënter 40 Joer sinn d'Carrièren vun Erzéier a Sozialpädagogen kloer ënnerbewäert. Wéi setzt dir iech dofir an, datt dat wat scho säit Joeren versprach gëtt (an zwar eng richteg Aklasséierung vun dëse Carrièren), endlech Realitéit gëtt?

L'LSAP ass der Meenung dass d'Carrière vum Educateur an der Fonction publique där vum Rédacteur muss ugepasst ginn, well béid Carrièren dee selwechten Ofschloss erfuerderen: den diplôme de fin d'études secondaires ou secondaires techniques.

Och d'Carrière vum Educateur gradué muss gläichgestallt gi mat anere Beruffer aus der Fonction publique, déi e Bac+3 erfuerderen. Dës Upassung muss am Kader vun der Reform vum Statut vun der Fonction publique virgeholl ginn.